



Cumün da vaschins Zernez

Protocol

Radunanza da vaschins da mardi, als 27 favrer 2018, a las 20.00, i'l center cumünal a Zernez

Preschaints: 15 vaschinas e vaschins cun dret da vuschar

S-chüsats: Arno Felix e Mattias Bulfoni

Tractandas:

1. **Salüd e bivgnaint**
 2. **Tscherna da duos scrutinaduors**
 3. **Protocol da l'ultima radunanza da vaschins dals 20 december 2017**
 4. **Revisiun totala da la ledscha da dret da vaschinadi dal cumün da vaschins da Zernez**
 5. **Vendita da terrain per schlargiar la via dal Pass dal Flüela da Pra d'Less fin sü Punt Pignai: *Charta dal cusglier guvernativ Mario Cavigeli – nouva valütaziun da la situaziun e decisiun***
 6. **Dumonda per ün dret da passagi per metter suot terra la lingia da condot electric per l'implant d'inchaschamaint da l'aua da Tantermozza, da vart da las Ovras Electricas d'Engiadina**
 7. **Orientaziuns e varia**
-

1. Salüd

Il president salüda la radunanza e giavüscha la buna saira. El constatescha cha la bannida es ida oura sco üsità e cha la radunanza es abla da decider. El preschainta la glista da tractandas e lascha approvar quella da la radunanza.

2. Tscherna da duos scrutinaduors

I basta cun ün scrutinadur e sco tal vain tschernü Fabian Schorta.

3. Protocol da la radunanza dals 20 december 2017

Il protocol es stat exposat illas assas nairas e sülla pagina d'internet dal cumün. El vain approvà sainza cuntravusch.

4. Revisiun totala da la ledscha da dret da vaschinadi dal cumün da vaschins da Zernez

Il president e l'actuar preschaintan la tractanda. La revisiun ha da gnir fatta surtuot pervia cha la ledscha superiura es gnüda revaisa e la versiun revaisa es ida in vigur sül cumanzamaint da quist on. I vegnan preschantadas e decleradas a la radunanza surtuot las müdadas cun ir tras la proposta preparada da la suprastanza. La proposta da la suprastanza vain acceptada cun üna agiunta in art. 3 e cun agiundscher in art. 11 cha quista lescha rimplazza tuot las versiuns plü veglias.

5. Vendita da terrain per schlargiar la via dal Pass dal Flüela da Pra d'Less fin sü Punt Pignai: *Charta dal cusglier guvernativ Mario Cavigeli – nouva valütaziun da la situaziun e decisiun*

In occasiun da l'ultima radunanza, nempe la radunanza dals 20 december, d'eira gnü decis da scriver üna charta a la regenza cun far la cundiziun chi vegna prochatschà il sviamaint da Susch, avant co chi vegna vendü terrain. Davo avair scrit üna charta a la regenza e survgni resposta da quella (las chartas sun stattas expostas) propuona la suprastanza uossa da gnir incunter a la vendita ed uschè prevgnir ad üna expropriaziun. Davo animada discussiun ha la radunanza decis cun 13 cunter 2 vuschs da seguir a la proposta da la suprastanza.

6. Dumonda per ün dret da passagi per metter suot terra la lingia da condot electric per l'implant d'inchaschamaint da l'aua da Tantermozza, da vart da las Ovras Electricas d'Engiadina

Il president, Rico Zala, introdüa la tractanda ed i vain muossà ün plan da la lingia previssa. Quella traversa las parcelas da vaschins nr. 578 e nr. 942. Il capo dal cumün politic declera cha quist proget haja ün connex eir culla vendita da forza per las chasas da Carolina e per l'implant da tir da schaubgias in Arduond, ma cha sclerimaints han muossà cha'l proget saja positiv eir pels intents dal cumün. La radunanza conceda il dret da passagi cun unanimità da vuschs.

7. Orientaziuns e Varia

Il president da vaschins, Rico Zala, orientescha a la radunanza sur dad oters affars dal cumün da vaschins:

- I nun ha dat fin hoz ingünas dumondas da natüralisaziun, uschè chi nu d'eira ün problem cha la revisiun da la ledscha es gnüda decisa pür hoz. Dal rest nun haja dat neir ingünas natüralisaziuns simplifichadas tenor ledscha federala.
- Swissgrit fa lavuors da mantegnimaint pro las lingias d'ota tensiun. Da la prüma part da quellas lavuors d'eira la radunanza gnüda orientada fingià als 20 december. Uossa vegna cuntinuà culla lingia vers Susch, Lavin e l'Engiadina Bassa.

Suot la tractanda varia vain fatta la dumonda schi nu füess pussibel da far las radunanzas da vaschins mincha vouta in ün'otra fracziun. La suprastanza da vaschins piglia incunter la proposta e tratta quella avant co banir la prosma radunanza.

La radunanza po gnir serrada a las 21.10.

Il president:

L'actuar:

Rico Zala

Hermann Thom